



六子歸儒集卷九

揚子

法言

學行篇

學行之上也言之次也教人又其次也咸無
焉爲衆人或曰人羨久生將以學也可謂好
學已乎曰未之好也學不羨天之道不在仲
尼乎仲尼駕說者也不在茲儒乎如將復駕



其所說則莫若使諸儒金口而木舌或曰學無益也如質何曰未之思矣夫有刀者礪諸有玉者錯諸不礪不錯焉攸用礪而錯諸質在其中矣否則輟螟蠕之子殪而逢螺羸祝之曰類我類我久則肖之矣速哉七十子之肖仲尼也或問世言鑄金金可鑄歟曰吾聞覲君子者問鑄人不問鑄金或曰人可鑄歟曰孔子鑄顏淵矣或人踰爾曰旨哉問鑄金

得鑄人學者所以修性也視聽言貌思性所有也學則正否則邪師哉師哉桐子之命也務學不如務求師師者人之模範也模不模範不範爲不少矣一閔之市不勝異意焉一卷之書不勝異說焉一閔之市必立之平一卷之書必立之師習乎習以習非之勝是也况習是之勝非乎於戲學者審其是而已矣或曰焉知是而習之曰視日月而知衆星之

蔑也仰聖人而知衆說之小也學之爲王者
事其已久矣堯舜禹湯文武汲汲仲尼皇皇
其已久矣人而不學雖無憂如禽何學者所
以求爲君子也求而不得者有矣夫未有不
求而得之者也晞驥之馬亦驥之乘也晞顏
之人亦顏之徒也或曰顏徒易乎晞之則是
曰昔顏常晞夫子矣正考甫常晞尹吉甫矣
公子奚斯常晞正考甫矣如不欲晞則已矣

如欲晞孰禦焉或曰書與經同而世不尚治
之可乎曰可或人啞爾笑曰須以發策決科
曰大人之學爲道也小人之學爲利也子爲
道乎爲利乎或曰耕不獲獵不饗耕獵乎曰
耕道而得道獵德而得德是獲饗也吾不覩
參辰之相比也是以君子貴遷善遷善也者
聖人之徒歟百川學海而至于海丘陵學山
而不至于山是故惡夫畫也朋而不心面朋

也友而不心面友也或謂子之治產不如丹圭之富曰吾聞先生相與言則以仁與義市井相與言則以財與利如其富或曰先生生無以養死無以葬如之何曰以其所以養養之至也以其所以葬葬之至也或曰猗頓之富以爲孝不亦至乎顏其餒矣曰彼以其粗顏以其精彼以其圓顏以其貞顏其劣乎顏其劣乎或曰使我紆朱懷金其樂不可量也

曰紆朱懷金之樂不如顏氏子之樂顏氏子之樂也內紆朱懷金之樂也外或曰請問屢空之內曰顏不孔雖得天下不足以爲樂然亦有苦乎曰顏苦孔之卓也或人瞿然曰茲苦也祇其所以爲樂也歟

吾子篇

或問吾子少而好賦曰然童子彫蟲篆刻俄而曰壯夫不爲也或曰賦可以諷乎曰諷則已不已吾恐不免於勸也或曰霧縠之組麗曰女工之蠹矣劔客論曰劔可以愛身曰狴犴使人多禮乎或問景差唐勒宋玉枚乘之賦也益乎曰必也淫淫則柰何曰詩人之賦麗以則辭人之賦麗以淫如孔氏之門用賦

也則賈誼升堂相如入室矣如其不用何或問蒼蠅紅紫曰明視問鄭衛之似曰聰聽或曰朱曠不世如之何曰亦精之而已矣或問交五聲十二律也或雅或鄭何也曰中正則雅多哇則鄭請問本曰黃鐘以生之中正以平之確乎鄭衛不能入也或曰女有色書亦有色乎曰有女惡華丹之亂窈窕也書惡淫辭之涵法度也或問屈原智乎曰如玉如瑩

爰變丹青如其智如其智或曰君子尚辭乎曰君子事之爲尚事勝辭則伉辭勝事則賦事辭稱則經足言足容德之藻矣或問公孫龍詭辭數萬以爲法法歟曰斷木爲棊椀革爲鞠亦皆有法焉不合乎先王之法者君子不法也觀書者譬諸觀山及水升東嶽而知衆山之崩坼也况介丘乎浮滄海而知江河之惡沱也况枯澤乎捨舟航而濟乎瀆者末

矣捨五經而濟乎道者末矣棄常珍而嗜乎異饌者惡覩其識味也委大聖而好乎諸子者惡覩其識道也山徑之蹊不可勝由矣向牆之戶不可勝入矣曰惡由入曰孔氏孔氏者戶也曰子戶乎曰戶哉戶哉吾獨有不戶者矣或欲學蒼頡史篇曰史乎史乎愈於妄闕也或曰有人焉自姓孔而字仲尼入其門升其堂伏其几襲其裳則可謂仲尼乎曰其

文是也其質非也敢問質曰羊質而虎皮見草而說見豺而戰忘其皮之虎也多聞則守之以約多見則守之以卓寡聞則無約也寡見則無卓也震風凌雨然後知夏屋之爲帡幪也虐政虐世然後知聖人之爲郭郭也古者楊墨塞路孟子辭而闢之廓如也後之塞路者有矣竊自比於孟子或曰人各是其所是而非其所非將誰使正之曰萬物紛錯則

懸諸天衆言淆亂則折諸聖或曰惡覩乎聖而折諸曰在則人亡則書其統一也

脩身篇

脩身以爲弓矯思以爲矢立義以爲的莫而後發發必中矣人之性也善惡混脩其善則爲善人脩其惡則爲惡人氣也者所適善惡之馬也歟或曰孔子之事多矣不用則亦勤且憂乎曰聖人樂天知命樂天則不勤知命則不憂公儀子董仲舒之才之邵也使見善不明用心不剛儔克爾或問治已曰治已以

仲尼或曰治已以仲尼仲尼奚寡也曰率馬以驥不亦可乎或問何如斯謂之人曰取四重去四輕則可謂之人曰何謂四重曰重言重行重貌重好言重則有法行重則有德貌重則有威好重則有觀敢問四輕曰言輕則招憂行輕則招幸貌輕則招辱好輕則招淫或曰回之箠瓢臞如之何曰明明在上百官牛羊亦山雌也闇闇在上箠瓢粹茹亦山雌

也何其臞千鈞之輕烏獲力也箠瓢之樂顏氏德也或問犁牛之鞞與玄駢之鞞有以異乎曰同然則何以不犁也曰將致孝乎鬼神不敢以其犁也如剗羊刺豕罷賓犒師惡在犁不犁也有德者好問聖人或曰魯人鮮德奚其好問仲尼也曰魯未能好問仲尼故也如其好問仲尼則魯作東周矣或問人有倚孔子之牆絃鄭衛之聲誦韓莊之書則引諸

門乎曰在夷貉則引之倚門牆則麾之惜乎
衣未成而轉爲裳也觀乎賢人則見衆人觀
乎聖人則見賢人觀乎天地則見聖人天下
有三好衆人好已從賢人好已正聖人好已
師天下有三檢衆人用家檢賢人用國檢聖
人用天下檢天下有三門由於情欲入自禽
門由於禮義入自人門由於獨智入自聖門
或問士何如斯可以裊身曰其爲中也弘深

其爲外也肅括則可以裊身矣

問道篇

或問道曰道也者通也無不通也或曰可以
適他歟曰適堯舜文王者爲正道非堯舜文
王者爲他道君子正而不他或問道曰道若
塗若川車航混混不捨晝夜或曰焉得直道
而由諸曰塗雖曲而通諸夏則由諸川雖曲
而通諸海則由諸或曰事雖曲而通諸聖則
由諸乎道德仁義禮譬諸身乎或問天曰吾

於天歟見無爲之爲矣或問彫刻衆形者匪
天歟曰以其不彫刻也如物刻而彫之焉得
力而給諸老子之言道德吾有取焉耳及搃
提仁義絕滅禮學吾無取焉耳聖人之言似
於水火或問水火曰水測之而益深窮之而
益遠火用之而彌明宿之而彌社或曰太上
無法而治法非所以爲治也曰鴻荒之世聖
人惡之是以法始乎伏羲而成乎堯或問八

荒之禮禮也樂也孰是曰殷之以中國或曰
孰爲中國曰五政之所加七賦之所養中於
天地者爲中國過此而往人也哉聖人之治
天下也礙諸以禮樂無則禽異則貉吾見諸
子之小禮樂也不見聖人之小禮樂也孰有
書不由筆言不由舌吾見天常爲帝王之筆
舌也或問道有因無因乎曰可則因否則革
或問無爲曰奚爲哉在昔虞夏襲堯之爵行

堯之道法度彰禮樂著垂拱而視天民之阜也無爲矣紹桀之後纂紂之餘法度廢禮樂虧安坐而視天民之死無爲乎狙詐之家曰狙詐之計不戰而屈人兵堯舜也曰不戰而屈人兵堯舜也霑項漸襟堯舜乎銜玉而賈石者其狙詐乎或問狙詐與亡孰愈曰亡愈或曰子將六師則誰使曰御得其道則天下狙詐咸作使御失其道則天下狙詐咸作敵

故有天下者審其御而已矣或問威震諸侯須於征歟狙詐之力也如其亡曰威震諸侯須於狙詐可也未若威震諸侯而不須狙詐也或曰無狙詐將何以征乎曰縱不得不征不有司馬法乎何必狙詐乎申韓之術不仁之至矣若何牛羊之用人也若牛羊用人則狐狸螻蛄不腹臘也歟或曰刀不利筆不銛而獨加諸砥不亦可乎曰人砥則秦尚矣或

曰刑名非道邪何自然矣曰何必刑名圍碁擊劍反自眩刑亦皆自然也由其大者作正道由其小者作姦道或曰申韓之法非法歟曰法者謂唐虞成周之法也如申韓如申韓莊周申韓不乖寡聖人而漸諸篇則顏氏之子閔氏之孫其如台或曰莊周有取乎曰少欲鄒衍有取乎曰自持至周罔君臣之義衍無知於天地之間雖隣不覲也

問神篇

或問神曰心請聞之曰潛天而天潛地而地天地神明而不測者也心之潛也猶將測之況於人乎況於事倫乎敢問潛心于聖曰昔仲尼潛心於文王矣達之顏淵亦潛心於仲尼矣未達一聞耳神在所潛而已矣天神天明照知四方天精天粹萬物作類人心其神矣乎操則存捨則亡能常操而存者其惟聖

人乎龍蟠于泥蚘其肆矣蚘哉蚘哉惡覩龍之志也歟或曰龍必欲飛天乎曰時飛則飛時潛則潛旣飛且潛食其不妄形其不可得而制也歟曰聖人不制則何爲乎姜里曰龍以不制爲龍聖人以不手爲聖人或曰經可損益歟曰易始八卦而文王六十四其益可知也詩書禮春秋或因或作而成於仲尼乎其益可知也故夫道非天然應時而造者損

益可知也或曰易損其一雖憊知闕焉至書之不備過半矣而習者不知惜乎書序之不如易也曰彼數也可數焉故也如書序雖孔子亦末如之何矣昔之說書者序以百而酒誥之篇俄空焉今亡夫虞夏之書渾渾爾商書灑灑爾周書噩噩爾下周者其書誰乎或問聖人之經不可使易知歟曰不可天俄而可度則其覆物也淺矣地俄而可測則其載

物也薄矣大哉天地之爲萬物郭五經之爲
衆說郭或問聖人之作事不能昭若日月乎
何後世之訾訾也曰瞽曠能默瞽曠不能齊
不齊之耳狄牙能喊狄牙不能齊不齊之口
君子之言幽必有驗乎明遠必有驗乎近大
必有驗乎小微必有驗乎著無驗而言之謂
妄君子妄乎不妄言不能達其心書不能達
其言難矣哉惟聖人得言之解得書之體白

日以照之江河以滌之浩浩乎其莫之禦也
或曰淮南太史公者其多知歟曷其雜也曰
雜乎雜人病以多知爲雜惟聖人爲不雜或
曰述而不作玄何以作曰其事則述其書則
作育而不苗者吾家之童烏乎九齡而與我
玄文或曰玄何爲曰爲仁義曰孰不爲仁孰
不爲義曰勿雜也而已矣或問經之艱易曰
存亡或人不論曰其人存則易亡則艱延陵

季子之於樂也其庶矣乎如樂弛雖札末如之何矣如周之禮樂庶事之備也每可以爲不難矣如秦之禮樂庶事之不備也每可以爲難矣衣而不裳未知其可也裳而不衣未知其可也衣裳其順矣乎或問文曰訓問武曰克未達曰事得其序之謂訓勝已之私之謂克爲之而行動之而光者其德乎或曰知德者鮮何其光曰我知爲之不我知亦爲之

厥光大矣必我知而爲之光亦小矣或曰君子病沒世而無名盍勢諸名卿可幾也曰君子德名爲幾梁齊趙楚之君非不富且貴也惡乎成名谷口鄭子真不屈其志而耕乎巖石之下名震于京師豈其卿豈其卿或問人曰難知也曰焉難曰太山之與螳垤江河之與行潦非難也大聖之與大佞難也嗚呼能參以似者爲無難

問明篇

敢問大聰明曰眩眩乎惟天為聰惟天為明
 夫能高其目而下其耳者匪天也夫孟子疾
 過我門而不入我室或曰亦有疾乎曰據我
 華而不食我實或謂仲尼事彌其年蓋天勞
 諸病矣夫曰天非獨勞仲尼亦自勞也天病
 乎哉天樂天聖樂聖或問鳥有鳳獸有麟鳥
 獸皆可鳳麟乎曰群鳥之於鳳也群獸之於

麟也形性豈群人之於聖乎或曰甚矣聖道無益於庸也聖讀而庸行盍去諸曰甚矣子之不達也聖讀而庸行猶有聞焉去之阮也阮秦者非斯乎投諸火或問人何尚曰尚智曰多以智殺身者何其尚曰昔臯陶以其智爲帝謨殺身者遠矣箕子以其智爲武王陳洪範殺身者遠矣仲尼聖人也或劣諸子貢子貢辭而精之然後廓如也於戲觀書者違

子貢雖多亦何以爲慎哉成湯丕承也文王淵懿也或問丕承曰由小致大不亦丕乎革夏以天不亦承乎淵懿曰重易六爻不亦淵乎浸以光大不亦懿乎或問命曰命者天之命也非人爲也人爲不爲命請問人爲曰可以存亡可以死生非命也命不可避也或曰顏氏之子冉氏之孫曰以其無避也若立巖牆之下動而徵病行而招死命乎命乎吉人

凶其吉凶人吉其凶辰乎辰曷來之遲去之速也君子競諸譎言敗俗譎好敗則姑息敗德君子謹於言慎於好亟於時吾不見震風之能動聾聵也或問君子在治曰若鳳在亂曰若鳳或人不諭曰未之思矣曰治則見亂則隱鴻飛冥冥戈人何慕焉鶴明遴集食其潔者矣鳳鳥踳踳匪堯之庭亨龍潛升其貞利乎或曰龍何可以貞利而亨曰時未可而

潛不亦貞乎可而升不亦利乎潛升在已用之以時不亦亨乎或問活身曰明哲或曰童蒙則活何乃明哲乎曰君子所貴亦越用明保慎其身也如庸行翳路衝衝而活君子不貴也楚兩龔之絜其清矣乎蜀莊沉冥蜀莊之才之珍也不作苟見不治苟得久幽而不改其操雖隨和何以加諸舉茲以旃不亦寶乎吾珍莊也居難爲也或問堯將讓天下於

許由由耻有諸曰好大者爲之也顧由無求於世而已矣或問韓非作說難之書而卒死乎說難敢問何反也曰說難蓋其所以死乎曰何也曰君子以禮動以義止合則進否則退確乎不憂其不合也夫說人而憂其不合則亦無所不至矣或曰說之不合非憂邪曰說不由道憂也由道而不合非憂也或問哲曰旁明厥思問行曰旁通厥德

寡見篇

多聞見而識乎正道者至識也多聞見而識乎邪道者迷識也或問五經有辯乎曰惟五經爲辯說天者莫辯乎易說事者莫辯乎書說體者莫辯乎禮說志者莫辯乎詩說理者莫辯乎春秋捨斯辯亦小矣天下之亡聖也久矣呱呱之子各識其親誆誆之學各習其師精而精之是在其中矣或曰良玉不彫美

言不文何謂也曰玉不彫璵璠不作噐言不
文典謨不作經或問司馬子長有言曰五經
不如老子之約也當年不能極其變終身不
能究其業曰若是則周公惑孔子賊古者之
學耕且養三年通一經今之學也非獨爲之
華藻也又從而繡其鞶帨惡在老不老也鷦
明冲天不在六翮乎拔而傳尸鳩其累矣夫
由震乎天風薄乎山雲徂乎方雨流乎淵其

事矣乎魏武侯與吳起浮於西河寶河山之
固起曰在德不在固曰美哉言乎使起之兵
每如斯則太公何以加諸或問周寶九鼎寶
乎曰噐寶也噐寶待人而後寶齊桓晉文已
下至於秦兼其無觀已或曰秦無觀奚其兼
曰所謂觀觀德也如觀兵開闢以來未有秦
也或問魯用儒而削何也曰魯不用儒也昔
在姬公用於周而四海皇皇莫枕于京孔子

用於魯齊人章章歸其侵疆魯不用真儒故也如用真儒無敵於天下安得削浩浩之海濟樓航之力也航人無楫如航何或曰奔壘之車沉流之航可乎曰否或曰焉用智曰用智於未奔沉大寒而後索衣裘不亦晚乎乘國者其如乘航乎航安則人斯安矣惠以厚下民忘其死忠以衛上君念其賞自後者人先之自下者人高之誠哉是言也或曰弘羊

摧利而國用足盍摧諸曰譬諸父子爲人父而摧其子縱利如子何卜式之云不亦匡乎或曰因秦之法清而行之亦可以致平乎曰譬諸琴瑟鄭衛調俾夔因之亦不可以致簫韶矣或問處秦之世抱周之書益乎曰舉世寒貂狐不亦燠乎或曰炎之以火沃之以湯燠亦燠矣曰燠哉燠哉時亦有寒者矣非其時而望之非其道而行之亦不可以至矣秦

六子歸儒集 揚子
之有司負秦之法度秦之法度負聖人之法
度秦弘違天地之道而天地違秦亦弘矣

五百篇

或問五百歲而聖人出有諸曰堯舜禹君臣
也而並文武周公父子也而處湯孔子數百
歲而生因往以推來雖千一不可知也聖人
有以擬天地而叅諸身乎或問聖人有詘乎
曰有曰焉詘乎曰仲尼於南子所不欲見也
於陽虎所不欲敬也見所不見敬所不敬不
詘如何或曰衛靈公問陳則何以不詘曰詘

身將以信道也如詘道而信身雖天下不可
爲也聖人重其道而輕其祿衆人輕其道而
重其祿聖人曰於道行歟衆人曰於祿殖歟
昔者齊魯有大臣史失其名曰如何其大也
曰叔孫通欲制君臣之儀徵先生於齊魯所
不能致者二人曰若是則仲尼之開跡諸侯
也非邪曰仲尼開跡將以自用也如委已而
從人雖有規矩準繩焉得而用之或問孔子

之時諸侯有知其聖者歟曰知之曰知之則
曷爲不用曰不能曰知聖而不能用也可得
聞乎曰用之則宜從之從之則棄其所習逆
其所順彊其所劣捐其所能衝衝如也非天
下之至德孰能用之或問孔子知其道之不
用也則載而惡乎之曰之後世君子曰賈如
是不亦鈍乎曰衆人愈利而後鈍聖人愈鈍
而後利關百聖而不慙蔽天地而不耻能言

之類莫能加也貴無敵富無倫利孰大焉或問其有繼周者雖百世可知也秦已繼周矣不待夏禮而治者其不驗乎曰聖人之言天也天妄乎繼周者未欲泰平也如欲泰平也捨之而用佗道亦無由至矣赫赫乎日出之光群目之用也渾渾乎聖人之道群心之用也或問天地簡易而聖人法之何五經之支離曰支離蓋其所以爲簡易也已簡已易焉

支焉離或曰聖人無益於庸也曰世人之益者倉廩也取之如單仲尼神明也小以成小大以成大雖山川丘陵草木鳥獸裕如也如不用也神明亦末如之何矣或問聖人占天乎曰占天地若此則史也何異曰史以天占人聖人以人占天或問星有甘石何如曰在德不在星德隆則晷星星隆則晷德也或問大人曰無事於小爲大人請問小曰事非禮

義爲小聖人之言遠如天賢人之言近如地
瓏璽其聲者其質玉乎聖人矢口而成言肆
筆而成書言可聞而不可殫書可觀而不可
盡周之士也貴秦之士也賤周之士也肆秦
之士也拘月未望則載魄于西旣望則終魄
于東其遡於日乎或問何如動而見畏曰畏
人何如動而見侮曰侮人夫見畏與見侮無
不由已或問禮難以彊世曰難故彊世如夷

俟倨肆羈角之哺果而啗之奚其彊或性或
彊及其名一也見弓之張兮弛而不失其良
兮或曰何謂也曰撒之而已矣川有防噐有
範見禮教之至也經營然後知幹楨之克立
也莊楊蕩而不法墨晏儉而廢禮申韓險而
無化鄒衍迂而不信聖人之材天地也次山
陵川泉也次鳥獸草木也

六子歸儒集
卷之
三
七
若齊書八金

先知篇

先甲一日易後甲一日難或問何以治國曰
立政曰何以立政曰政之本身也身立則政
立矣或問爲政有幾曰思斲或問思斲曰昔
在周公征于東方四國是王召伯述職蔽芾
甘棠其思矣夫齊桓公欲徑陳陳不果內執
表濤塗其斲矣夫嗚呼從政者審其思斲而
已矣或問何思何斲曰老人老孤人孤病者

六子歸儒集
卷之
三
七
若齊書八金

養死者塋男子畝婦人桑之謂思若汗人老
屈人孤病者獨死者逋田畝荒杼軸空之謂
斲爲政日新或人敢問日新日使之利其仁
樂其義厲之以名引之以美使之陶陶然之
謂日新或問民所勤曰民有三勤曰何哉所
謂三勤曰政善而吏惡一勤也吏善而政惡
二勤也政吏駢惡三勤也禽獸食人之食土
木衣人之帛穀人不足於晝絲人不足於夜

之謂惡政聖人文質者也車服以彰之藻色
以明之聲音以揚之詩書以光之籩豆不陳
玉帛不分琴瑟不鏗鍾鼓不眩吾則無以見
聖人矣或曰以往聖人之法治將來譬猶膠
柱而調瑟有諸曰有之曰聖君少而庸君多
如獨守仲尼之道是漆也曰聖人之法未嘗
不關盛衰焉昔者堯有天下舉大綱命舜禹
夏殷周屬其子不膠者卓矣唐虞象刑惟明

夏后肉辟三千不膠者卓矣堯親九族協和
萬國湯武桓桓征伐四克由是言之不膠者
卓矣禮樂征伐自天子所出春秋之時齊晉
實予不膠者卓矣或曰人君不可不學律令
曰君子爲國張其綱紀謹其教化導之以仁
則下不相賊莅之以廉則下不相盜臨之以
正則下不相詐修之以禮義則下多德讓此
君子所當學也如有犯法則司獄在或苦亂

曰綱紀曰惡在於綱紀曰大作綱小作紀如
綱不綱紀不紀雖有羅網惡得一目而正諸
或曰齊得夷吾而霸仲尼曰小噐請問大噐
曰大噐其猶規矩準繩乎先自治而後治人
之謂大噐或曰爲政先殺後教曰嗚呼天先
秋而後春乎將先春而後秋乎民可使覲德
不可使覲刑覲德則純覲刑則亂象龍之致
雨也難矣哉曰龍乎龍乎或問政核曰真僞

真僞則政核如真不真僞不僞則政事不核
鼓舞萬物者其雷風乎鼓舞萬民者其號令
乎雷不一風不再聖人樂天陶成天下之化
使人有士君子之噐者也或曰載使子草律
曰吾不如弘恭草奏曰吾不如陳湯聖人之
道譬猶日之中矣不及則未過則具什一天
下之正也多則桀寡則貉井田之田田也肉
刑之刑刑也田也者與衆田之刑也者與衆
服侯服人亦多不足矣

棄之法無限則庶人田侯田處侯宅食侯食
服侯服人亦多不足矣

重黎篇

或問南正重司天北正黎司地今何僚也曰
近羲近和孰重孰黎曰羲近重和近黎或問
黃帝終始曰託也昔者妣氏治水土而巫步
多禹扁鵲盧人也而醫多盧夫欲讐僞者必
假真禹乎盧乎終始乎或問渾天曰落下閤
營之鮮于妄人度之耿中丞象之幾乎幾乎
莫之能遠也請問蓋天曰蓋哉蓋哉應難未

幾也或問趙世多神何也曰神怪茫茫若存若亡聖人曼云或問子胥種蠡孰賢曰胥也俾吳作亂破楚入郢鞭尸藉館皆不由德謀越諫齊不式不能去卒眼之種蠡不彊諫而山棲俾其君詘社稷之靈而童僕又終弊吳賢皆不足邵也至蠡策種而遁肥矣哉或問陳勝吳廣曰亂曰不若是則秦不亡曰亡秦乎恐秦未亡而先亡矣或問六國並其已久

矣一病一瘳迄始皇三載而咸時激地保人事乎曰具請問事曰孝公以下彊兵刀農以蠶食六國事也保曰東溝大河南阻高山西采雍梁北鹵涇垠便則申否則蟠保也激曰始皇方斧將相方刀六國方木將相方肉激也或問秦伯列爲侯衛卒吞天下而赧曾無以制乎曰天子制公侯伯子男也庸節節莫差於僭僭莫僭於祭祭莫重於地地莫重於

天則襄文宣靈其兆也昔者襄公始僭西時以祭白帝文宣靈宗興鄜密上下用事四帝而天王不匡反致文武胙是以四疆之內各以其力來侵攘肌及骨赧獨何以制秦乎或問嬴政二十六載天下擅秦秦十五載而楚楚五載而漢五十載之際而天下三擅天邪人邪曰具周建子弟列名城班五爵流之十二當時雖欲漢得乎六國蚩蚩爲羸弱姬卒

之屏營羸擅其政故天下擅秦秦失其猷罷侯置守守失其微天下孤睽項氏暴疆改宰侯王故天下擅楚擅楚之月有漢朔業山南發跡三秦追項山東故天下擅漢天也人曰兼尚才權右計左數動謹於時人也天不人不因人不天不成或問楚敗垓下方死曰天也諒乎曰漢屈群策群策屈群力楚傲群策而自屈其力屈人者克自屈者負天曷故焉

或問秦楚旣爲天典命矣秦縊灞上楚分江
西興廢何速也曰天胙光德而隕明忒昔在
有熊高陽高辛唐虞三代咸有顯懿故天胙
之爲神明主且著在天庭是生民之願也厥
饗國久長若秦楚疆闔震撲胎籍三正播其
虐於黎苗子弟且欲喪之况於民乎况於鬼
神乎廢未速也或問仲尼大聖則天曷不胙
曰無土然則舜禹有土乎曰舜以堯作土禹

以舜作土或問聖人表裏曰威儀文辭表也
德行忠信裏也或問義帝初矯劉龕南陽項
救河北二方分崩一離一合設秦得人如何
曰人無爲秦也喪其靈久矣韓信黥布皆劍
立南面稱孤卒窮時戮無乃勿乎或曰勿則
無名如何曰名者謂令名也忠不終而躬逆
焉攸令或問淳于越曰伎曲請問曰始皇方
虎捩而梟磔噬士猶腊肉也越興亢眉終無

橈辭可謂伎矣仕無妄之國食無妄之粟分
無妄之橈自令之間而不違可謂曲矣或問
茅焦歷井幹之死使始皇奉虛左之乘蔡生
欲安項咸陽不能移又亨之或者未辯歟曰
生捨其木侯而謂人木侯亨不亦宜乎焦逆
許而順守之雖辯磨虎牙矣或問甘羅之悟
呂不韋張辟疆之覺平勃皆以十二齡茂良
乎曰才也茂良不必父祖或問酈食其說陳

留下敖倉說齊罷歷下軍何辯也韓信襲齊
以身脂鼎何訥也曰夫辯也者自辯也如辯
人幾矣或問蒯通抵韓信不能下又狂之曰
方遭信閉如其抵曰熾可抵乎曰賢者司禮
小人司熾况拊鍵乎或問李斯盡忠胡亥極
刑忠乎曰斯以留客至作相用狂人之言從
浮大海立趙高之邪說廢沙丘之正阿意督
責焉用忠霍曰始元之初擁少帝之微摧燕

上官之鋒處興廢之分堂堂乎忠難矣哉至顯不終矣或問馮唐面文帝得廉頗李牧不能用也諒乎曰彼將有激也親屈帝尊以信亞夫之軍至頗牧曷不用哉德曰罪不孥宮不女館不新陵不墳或問交曰仁問餘耳曰光初竇灌曰凶終或問信曰不食其言請人曰晉荀息趙程嬰公孫杵臼秦大夫鑿穆公之側問義曰事得其宜之謂義或問季布忍

焉可爲曰能者爲之明哲不爲也或曰當布之急雖明哲如之何曰明哲不終項仕如終焉攸避或問賢曰爲人所不能請人曰顏淵黔婁四皓韋玄成問長者曰藺相如伸秦而屈廉頗欒布之不塗朱家之不德直不疑之不校韓安國之通使或問臣自得曰石太僕之對金將軍之謹張衛將軍之善慎邴大夫之不伐善請問臣自失曰李貳師之執二田

六子歸傳集 揚子
祈連之濫帥韓馮翊之愬蕭趙京兆之犯魏
或問持滿曰捥歆楊王孫保塋以矯世曰矯
世以禮保乎如矯世則葛溝尚矣或問周官
曰立事左氏曰品藻太史遷曰實錄

淵騫篇

或問淵騫之徒惡乎在曰寢或曰淵騫曷不
寢曰攀龍鱗附鳳翼巽以揚之勃勃乎其不
可及乎如其寢如其寢七十子之於仲尼也
日聞所不聞見所不見文章亦不足爲矣君
子絕德小人絕力或問絕德曰舜以孝禹以
功臯陶以謨非絕德邪力秦悼武烏獲任鄙
扛鼎抃牛非絕力邪或問勇曰軻也曰何軻

也曰軻也者謂孟軻也若荆軻君子盜諸請
問孟軻之勇曰勇於義而果於德不以貧富
貴賤死生動其心於勇也其庶乎魯仲連傷
而不制藺相如制而不傷或問鄒陽曰未信
而分疑忼辭免置幾矣哉或問信陵平原孟
嘗春申益乎曰上失其政姦臣竊國命何其
益乎樗里子之智也使知國如知葬則吾以
疾爲著龜周之順赧以成周而西傾秦之惠

文昭襄以西山而東并孰愈曰周也羊秦也
狼然則狼愈歟曰羊狼一也或問蒙恬忠而
被誅忠奚可爲也曰塹山堙谷起臨洮擊遼
水力不足而屍有餘忠不足相也或問呂不
韋其智矣乎以人易貨曰誰謂不韋智者歟
以國易宗呂不韋之盜穿窬之雄乎穿窬也
者吾見擔石矣未見雒陽也秦將白起不仁
奚用爲也長平之戰四十萬人死蚩尤之亂

六子歸集 卷之五
不過於此矣原野厭人之肉川谷流人之血
將不仁奚用爲翦曰始皇方獵六國而翦牙
歟或問要離非義者歟不以家辭國曰離也
火妻灰子以反於慶忌實蛛蝥之靡也焉可
謂之義也政也爲嚴氏犯韓刺相俠累曼面
爲姊實壯士之靡也焉可謂之義也軻也爲
丹奉於期之首燕督亢之圖入不測之秦實
刺客之靡也焉可謂之義也或問儀秦學乎

鬼谷術而習乎縱橫言安中國者各十餘年
是夫曰詐人也聖人惡諸曰孔子讀而儀秦
行何如也曰甚矣鳳鳴而鷲翰也曰然則子
貢不爲歟曰亂而不解子貢耻諸說而不富
貴儀秦耻諸或曰儀秦其才矣乎跡不蹈已
曰昔在任人帝曰難之亦才矣才乎才非吾
徒之才也美行園公綺里季夏黃公角里先
生言辭婁敬陸賈執正王陵申屠嘉折節周

六子歸儒集 揚子
昌汲黯守儒表固申公災異董相夏侯勝京
房或問蕭曹曰蕭也規曹也隨滕灌樊鄴曰
俠介叔孫通曰槩人也袁盎曰忠不足而談
有餘晁錯曰愚酷吏曰虎哉虎哉角而翼也
貨殖曰蚊曰血國三千使將䟽飲水褐博沒
齒然也或問循吏曰吏也游俠曰竊國靈也
佞幸曰不料而已或問近世社稷之臣曰若
張子房之智陳平之無悞絳侯勃之果霍將

軍之勇終之以禮樂則可謂社稷之臣矣或
問公孫弘董仲舒孰邇曰仲舒欲爲而不可
得弘容而已矣或問近世名卿曰若張廷尉
之平雋京兆之見尹扶風之絜王子貢之介
斯名卿矣將曰若條侯之守長平冠軍之征
伐博陸之持重可謂名將矣請問古曰鼓之
以道德征之以仁義輿尸血刃皆所不爲也
張騫蘇武之奉使也執節沒身不屈王命雖

古之庸使其猶劣諸世稱東方生之盛也言
不純師行不純表其流風遺書蔑如也或曰
隱者也曰昔之隱者吾聞其語矣又聞其行
矣或曰隱道多端曰固也聖言聖行不逢其
時聖人隱也賢言賢行不逢其時賢者隱也
談言談行不逢其時談者隱也昔者箕子之
漆其身也狂接輿之被其髮也欲去而恐懼
害者也箕子之洪範接輿之歌鳳也哉或問

東方生名過實者何也曰應諧不窮正諫穢
德應諧似優不窮似哲正諫似直穢德似隱
請問名曰談達惡比曰非夷齊而是柳下惠
戒其子以尚容首陽爲拙柱下爲工飽食安
坐以仕易農依隱玩世詭時不逢其滑稽之
雄乎或問柳下惠非朝隱者歟曰君子謂之
不恭古者高餓顯下祿隱妄譽仁之賊也妄
毀義之賊也賊仁近鄉原賊義近鄉訕或問

子蜀人也請人曰有李仲元者人也其爲人也柰何曰不屈其意不累其身曰是夷惠之徒歟曰不夷不惠可否之間也如是則奚名之不彰也曰無仲尼則西山之餓夫與東國之絀臣惡乎聞曰王陽貢禹遇仲尼乎曰明星皓皓華藻之力也歟曰若是則奚爲不自高曰皓皓者已也引而高之者天也子欲自高邪仲元世之師也見其貌者肅如也聞其

言者愀如也觀其行者穆如也但聞以德誦人矣未聞以德誦於人也仲元畏人也或曰育賁曰育賁也人畏其力而侮其德請條曰非正不視非正不聽非正不言非正不行夫能正其視聽言行者昔吾先師之所畏也如視不視聽不聽言不言行不行雖有育賁其猶侮諸

君子篇

或問君子言則成文動則成德何以也曰以其
其弮中而彪外也般之揮斤羿之激矢君子
不言言必有中也不行行必有稱也或問孟
子知言之要知德之奧曰非苟知之亦允蹈
之或曰子小諸子孟子非諸子乎曰諸子者
以其知異於孔子者也孟子異乎不異或曰
荀卿非數家之書佻也至于子思孟軻詭哉

曰吾於荀卿歟見同門而異戶也惟聖人爲
不異牛玄駢白睥而角其升諸廟乎是以君
子全德或問仲尼之術周而不泰大而不小
用之猶牛鼠也曰仲尼之道猶四瀆也經營
中國終入大海它人之道者西北之流也綱
紀夷貉或入于沱或淪于漢淮南說之用不
如太史公之用也太史公聖人將有取焉淮
南鮮取焉爾必也儒乎乍出乍入淮南也文

麗用寡長卿也多愛不忍子長也仲尼多愛
愛義也子長多愛愛奇也或問聖人之言炳
若丹青有諸曰吁是何言歟丹青初則炳久
則渝渝乎哉或曰聖人之道若天天則有常
矣奚聖人之多變也曰聖人固多變子游子
夏得其書矣未得其所以書也宰我子貢得
其言矣未得其所以言也顏淵閔子得其行
矣未得其所以行也聖人之書言行天也天

其少變乎或曰聖人自恣歟何言之多端也
曰子未覩禹之行水歟一東一北行之無礙
也君子之行獨無礙乎如何直往也水避礙
則通于海君子避礙則通于理君子好人之
好而忘己之好小人好己之好而忘人之好
或曰子於天下則誰與曰與夫進者乎或曰
貪夫位也慕夫祿也何其與曰此貪也非進
也夫進也者進於道慕於德殷之以仁義進

而進退而退日孳孳而不知勸者也或曰進
退則聞命矣請問退進曰昔乎顏淵以退爲
進天下鮮儷焉或曰人有齊死生同貧富等
貴賤何如曰作此者其有懼乎信死生齊貧
富同貴賤等則吾以聖人爲囂囂通天地人
曰儒通天地而不通人曰伎人必先作然後
人名之先求然後人與之人必其自愛也然
後人愛諸人必其自敬也然後人敬諸自愛

仁之至也自敬禮之至也未有不自愛敬而人愛敬之者也或問龍龜鴻鵠不亦壽乎曰壽曰人可壽乎曰物以其性人以其仁或問人言仙者有諸乎曰吁吾聞伏羲神農歿黃帝堯舜殂落而死文王畢孔子魯城之北獨子愛其死乎非人之所及也仙亦無益子之彙矣或曰聖人不師仙厥術異也聖人之於天下耻一物之不知仙人之於天下耻一日

之不生曰生乎生乎名生而實死也或曰世無仙則焉得斯語曰語乎者非囂囂也歟惟囂囂能使無爲有或問仙之實曰無以爲也有與無非問也問也者忠孝之問也忠臣孝子惶乎不惶或問壽可益乎曰德曰回牛之行德矣曷壽之不益也曰德故爾如回之殘牛之賊也焉德爾曰殘賊或壽曰彼妄也君子不妄有生者必有死有始者必有終自然

六子歸儒集 揚子 四十七 若齋書凡錄
之道也君子忠人况已乎小人欺已况人乎

孝至篇

孝至矣一言而該聖人不加焉父母子之天地歟無天何生無地何形天地裕於萬物萬物裕於天地子有含菽縕絮而致滋美其親將以求孝也人曰僞如之何曰假儒衣書服而讀之三月不歸孰曰非儒也或曰何以處僞曰有人則作之無人則輟之之謂僞觀人者審其作輟而已矣不爲名之名其至矣爲

名之名其次也或問忠言嘉謨曰言合稷契
之謂忠謨合臯陶之謂嘉或曰邵如之何曰
亦勗之而已庠則秦儀鞅斯亦忠嘉矣吾聞
諸傳老則戒之在得年彌高而德彌邵者是
孔子之徒歟或問羣言之長羣行之宗曰羣
言之長德言也羣行之宗德行也或問泰和
曰其在唐虞成周乎觀書及詩溫溫乎其和
可知也周康之時頌聲作乎下關雎作乎上

習治也齊桓之時緼而春秋美邵陵習亂也
故習治則傷始亂也習亂則好始治也漢德
其可謂允懷矣黃支之南大夏之西東鞞北
女來貢其珍漢德其可謂允懷矣世鮮焉芒
芒聖德遠人咸慕上也武義璜璜兵征四方
次也宗夷猾夏蠢迪王人屈國喪師無次也
鱗之儀儀鳳之師師其至矣乎螭虎桓桓鷹
隼猋猋未至也或曰誼誼北夷被我純績帶

我金犀珍膳寧鋤不亦享乎曰昔在高文武
實爲兵主今稽首來臣稱爲北藩是爲宗廟
之神社稷之靈也可不享乎龍堆以西大漠
以北鳥夷獸夷郡勞王師漢家不爲也朱厓
之絕捐之之力也否則介鱗易我衣裳君人
者務在殷民阜財明道信義致帝者之用成
天地之化使粒食之民祭也晏也享于鬼神
不亦饗乎天道勞功或問勞功曰日一日勞

考載曰功或曰君逸臣勞何天之勞曰於事
則逸於道則勞周公以來未有漢公之懿也
勤勞則過於阿衡漢興二百一十載而中天
其庶矣乎

六子歸儒集卷九

